

auff dem Grund des Glas/ davon das Element des Luftts gescheiden ist/ so werdet ihr findē ein dünne Massam oder Materiā, wirdt genant ein Corpus, oder ein Erden/ Das ist das dritte Element/ Vnd dasselb Corpus reibe zu Pulver auff einē Morsmelstein/ Darauff wirdt ein schwarz Pulver/ Behalt das Pulver besunder in einen Kolben/ wol vermacht/ biß daß du seinen bedarffst.

**Alhie vermerck/ wie man die zwey Element
soll purgieren vnd reinigen / von
ihrer Unreinigkeit.**

Nimb das erst Element Aquæ, vnd setz das ad B. M. acht tag. Dergleichen nimb das ander Element des Luftts/ mit seinem Kōlbel/ vnd setz das ad B. M. acht tag/ Also dz die Kōlbel wol vermacht seyen oben mit Wachs.

Darnach nimb ein jegliches besonder/ vnd setz das auff ein Capellen in ein Aschen/ vnd distillier ein jegliches Element besonder mit gutem Fewr. Vnd dise zwey Element solt du zu sieben mahlen also solvieren/ vnd distillieren/ vnd pureficieren/ allwegen jegliches besonder/ So sind sie gereiniget/ vnd wol bereit zu der Tinctur.

**Alhie vermerck/ wie man das dritte Element/
das Erdtrich soll purgieren.**

So nimb nun das Erdtrich/ oder die Pulver / vnd thue die in ein Kolben / vnd gieß darauff ein wenig Wasser von dem ersten Element Aquæ, also daß es zwen Finger hoch darüber gehe vber das Pulver / Vnd vermach das Glas/ vnd setz das ad Balneum Mariæ acht tag. Darnach nimb das Glas heraus/ vnd distillier das in einer Aschen mit gutē Fewr. Darnach so das Wasser ganz herüber ist distilliert/ so gib ihm ein grösser Fewr/ So wirdt sich sublimieren ein weisser schöner Sulphur, vnd sich oben anlegen/ dick an das Glas. So das geschehen ist/ so gib ihm noch stercker Fewr/ so wirdt sich der weisse
J Sul-